



INSTITUTE OF ANCIENT
NEAR EASTERN STUDIES
Charles University
Prague

መጽሐፈ:ሄኖክ::

The Book of Enoch

Book I
The Book of Watchers

Electronic edition of Ethiopic text
prepared by Michal Jerabek

THIS TEXT CANNOT BE SOLD UNDER ANY CIRCUMSTANCES.

Library of Ethiopian Texts, <http://anes235-1.ff.cuni.cz>, Prague

© Michal Jerabek, Prague 1995

Copyright Notice:

1995 Library of Ethiopian Texts, created and maintained by Michal Jerabek, Prague. Permission to use, copy, and distribute this text, for any NONCOMMERCIAL purpose is hereby granted without fee, provided that the copyright notice and this permission notice appear in all copies of this text. This text cannot be sold under any circumstances.

Preface:

This e-text is based on: A.Dillmann's *Liber Henoch aethiopice*, ad quinque codicum fidem editus cum variis lectionibus, Leipzig, 1851.

Please, report any error in Ethiopic text to
michal.jerabek@ff.cuni.cz.

Leave you e-mail address and you will be prompted after the corrections
are made so that you can upload corrected version.

Comments are welcome.

ምዕራፍ፡፩፡።

ክፍል፡፩፡።

ቃለ፡በረከት፡ዘሄኖክ፡ዘከመ፡ባረከ፡ኅሩያነ፡ወጻድቃነ፡እለ፡ሀለው፡ይኩኑ፡በዕለተ፡
ምንዳቤ፡ለአሰሰሎ፡ኩሉ፡እኩያን፡ወረሲዓን፡።
ወአውሥኦ፡ወይቤ፡ሄኖክ፡ብእሲ፡ጻድቅ፡ዘእምኅበ፡እግዚአብሔር፡እንዘ፡
አዕይንቲሁ፡ክሠቃት፡ወይሬኢ፡ራእየ፡ቅዱስ፡ዘበሰማያት፡ዘአርአዩኒ፡መላእክት፡
ወሰማዕኩ፡እምኅቤሆሙ፡ኩሎ፡ወእመርኩ፡አነ፡ዘእሬኢ፡ወአኮ፡ለዝ፡ትውልድ፡
አላ፡ለዘይመጽእ፡ትውልድ፡ርኑቃን፡።
በእንተ፡ኅሩያን፡እቤ፡ወአውሣእኩ፡በእንቲአሆሙ፡ምስለ፡ዘይወፅእ፡ቅዱስ፡ወዐቢይ፡
እማኅደሩ፡ወአምላክ፡ዓለም፡።
ወእምሆ፡ይከይድ፡ዲበ፡ሲና፡ደብር፡ወያስተርኢ፡በትዕይንቱ፡ያስተርኢ፡በጽንዐ፡
ኅይሉ፡እምሰማይ፡።
ወይፈርህ፡ኩሉ፡ወያድለቀልቁ፡ትጉሃን፡ወይነሥኦሙ፡ፍርህት፡ወረዓድ፡ዐቢይ፡
እስከ፡አጽናፈ፡ምድር፡።
ወይደነግ፡አድባር፡ነዋኃን፡ወይቴሐቱ፡አውግር፡ነዋኃት፡ወይትመሰው፡ከመ፡
መዓረ፡ግራ፡እምላብህ፡።
ወትሠጠም፡ምድር፡ወኩሉ፡ዘውስተ፡ምድር፡ይትሐገውል፡ወይከውን፡ፍትሕ፡ላዕለ፡
ኩሉ፡ወላዕለ፡ጻድቃን፡ኩሎሙ፡።
ለጻድቃንሰ፡ሰላመ፡ይገብር፡ሎሙ፡ወየዐቅቦሙ፡ለኅሩያን፡ወይከውን፡ሣህል፡
ላዕሌሆሙ፡ወይከውኑ፡ኩሎሙ፡ዘእምላክ፡ወይሤርሐ፡ይትባረኩ፡ወይሀርህ፡ሎሙ፡
ብርሃነ፡አምላክ፡።
ወናሁ፡መጽአ፡በትእልፈት፡ቅዱሳን፡ክመ፡ይግበር፡ፍትሕ፡ላዕሌሆሙ፡
ወያሐጉሎሙ፡ለረሲዓን፡ወይትዋቀስ፡ኩሎ፡ዘሥጋ፡በእንተ፡ኩሉ፡ዘገብሩ፡ወረሰዩ፡
ላዕሌሁ፡ኃጥአን፡ወረሲዓን፡።

ክፍል፡፪፡።

ጠየቁ፡ኩሎ፡ዘውስተ፡ሰማይ፡ግብረ፡እፎ፡ኢይመይጡ፡ፍናዊሆሙ፡ብርሃናት፡
ዘውስተ፡ሰማይ፡ከመ፡ኩሉ፡ይሠርቅ፡ወየዐርብ፡ሥሩዕ፡ኩሉ፡በበዘመኑ፡
ወኢይትዐደው፡እምትእዘዞሙ፡።
ርእይዎ፡ለምድር፡ወሰብው፡በእንተ፡ምግባር፡ዘይትገበር፡ላዕሌሃ፡እምቀዳሚ፡እስከ፡
ተፍጻሜቱ፡ከመ፡ኢይትመየጥ፡ኩሉ፡ግብሩ፡ለአምላክ፡እንዘ፡ያስተርኢ፡።
ርእይዎ፡ለሐጋይ፡ወለክረምት፡ከመ፡ኩላ፡ምድር፡መልአት፡ማየ፡ወደመና፡ወጠል፡
ወዝናም፡የዐርፍ፡ላዕሌሃ፡።

ክፍል፡፫፡።

ጠየቁ፡ወርኢኩ፡ከመ፡ኩሉ፡ዐፀው፡እፎ፡ያስተርእዩ፡ከመ፡ይቡስ፡ወኩሉ፡
አቋጽሊሆሙ፡ንጉፋት፡ዘእንበለ፡፲ ወ ፩ ዐፀው፡ዘኢይትነገሩ፡እለ፡ይጸንሐ፡
እምብሉይ፡እስከ፡ይመጽእ፡ሐዲስ፡እም ፪ ወእም ፫ ክረምት፡።

ክፍል፡፬፡።

ወዳግመ፡ጠየቁ፡መዋዕለ፡ሐጋይ፡ከመ፡ኮነ፡ፀሐይ፡ላእሌሃ፡በቅድሜሃ፡ወአንትሙሰ፡
ተኅሥሡ፡ምጽላለ፡ወጽላሎተ፡በእንተ፡ዋዕየ፡ፀሐይ፡ወምድርኒ፡ትውዒ፡እሙቀተ፡
ሐሩር፡ወአንትሙሰ፡ኢትክሉ፡ከይደቃ፡ለምድር፡ወኢኩኩሐ፡በእንተ፡ዋእያ፡።

ክፍል፡፭፡።

ጠየቁ፡እፎ፡ዐፀው፡በሐመልማለ፡አቋጽል፡ይትክደኑ፡ወይፈርዩ፡
ወሰብው፡በእንተ፡ኩሉ፡ወእእምሩ፡በከመ፡ገብረ፡ለክሙ፡እሎንተ፡ኩሎሙ፡
ዘሕያው፡ለዓለም፡።

ወምግባሩ፡ ቅድሜሁ፡ ለለዓመት፡ ዘይከውን፡ ወኩሉ፡ ምግባሩ፡ ይትቀነዩ፡ ሎቱ፡
 ወኢይትመቦጡ፡ አላ፡ በከመ፡ ሠርዐ፡ አምላክ፡ ከመዝ፡ ይትገበር፡ ኩሉ፡ ።
 ወርእዩ፡ እፎ፡ አብህርት፡ ወአፍላግ፡ ኅቡረ፡ ይፌጽሙ፡ ግብሮሙ፡ ።
 ወአንትሙሰ፡ ኢተዐገሥክሙ፡ ወኢገበርክሙ፡ ትእዛዘ፡ እግዚእ፡ እላ፡ ተዐደውክሙ፡
 ወሐመይክሙ፡ ዓቢያተ፡ ወድሩካተ፡ ቃላተ፡ በአፍ፡ ርኩስት፡ ዘዚአክሙ፡ ላዐለ፡ ዕበየ፡
 ዚአሁ፤ ይቡሳነ፡ ልብ፡ ኢትከውኑክሙ፡ ሰላም፡ ።
 ወበእንተዝ፡ አንትሙ፡ መዋዕሊክሙ፡ ትረግሙ፡ ወዓመታተ፡ ሕይወትክሙ፡ ተሐጉሉ፡
 ወይበዝላ፡ መርገም፡ ዘለዓለም፡ ወኢይከውኑክሙ፡ ሣህል፡ ።
 በውእቱ፡ መዋዕል፡ ትሁቡ፡ ሰላመ፡ ዚአክሙ፡ በርግመት፡ ዘለዓለም፡ ለኩሉ፡ ጸድቃን፡
 ወኪያክሙ፡ ይረግሙ፡ ኃጥአን፡ ዘልፈ፡ ወለክሙ፡ ኅቡረ፡ ምስለ፡ ኃጥአን፡ ።
 ወለኅሩያንሰ፡ ይከውን፡ ብርሃን፡ ወፍሥሓ፡ ወሰላም፡ ወእሙንቱ፡ ይወርስዋ፡ ለምድር፡
 ወለክሙሰ፡ ረሲዓን፡ ይከውኑክሙ፡ ርግመት፡ ።
 ወአመሂ፡ ይትወሀቦሙ፡ ሰላም፡ ጥብብ፡ ወኩሎሙ፡ እሎንቱ፡ የሐይወ፡ ወኢይደግሙ፡
 አበሳ፡ ኢበረሲዕ፡ ወኢበትዕቢት፡ አላ፡ ይገንዩ፡ ዘቦሙ፡ ጥብብ፡ ኢይደግሙ፡ አብሰ፡ ።
 ወኢይትኬነ፡ ኩሎ፡ መዋእለ፡ ሕይወቶሙ፡ ወኢይመውቱ፡
 በመቅሠፍት፡ ወኢበመዓት፡ አላ፡ ጥልቁ፡ መዋዕለ፡ ሕይወቶሙ፡ ይፌጽሙ፡ ወይልህቅ፡
 ሕይወቶሙ፡ በሰላም፡ ወዓመታተ፡ ፍሥሓሆሙ፡ ይበዝላ፡ በሐሣብ፡ ወበሰላም፡ ለዓለም፡
 ውስተ፡ ኩሉ፡ መዋእለ፡ ሕይወቶሙ፡ ።

ምዕራፍ፡ ፪።

ክፍል፡ ፩።

ወኮነ፡ እምዘ፡ በዝኑ፡ ውሉደ፡ ሰብእ፡ በእማንቱ፡ መዋእል፡ ተወልደ፡ ሎሙ፡ አዋልድ፡
 ሠናያት፡ ወላህያት፡ ።
 ወርእዩ፡ ኪያሆን፡ መላእክት፡ ውሉደ፡ ሰማያት፡ ወፈተውዎን፡ ወይቤሉ፡ በበይናቲሆሙ፡
 ንዑ፡ ንኅረይ፡ ለነ፡ አንስተ፡ እምውሉደ፡ ሰብእ፡ ወንለድ፡ ለነ፡ ውሉደ፡ ።
 ወይቤሎሙ፡ ስምያዛ፡ ዘውእቱ፡ መልአኮሙ፡ እፈርህ፡ ዮጊ፡ ኢትፈቅዱ፡ ይትገበር፡
 ዝንቱ፡ ግብር፡ ወእከውን፡ አነ፡ በሕቲትየ፡ ፈዳዪሃ፡ ለዛቲ፡ ኅጢአት፡ ዐባይ፡ ።
 ወአውሥኡ፡ ሎቱ፡ ኩሎሙ፡ ወይቤሉ፡ መሐላ፡ ንምሐል፡ ኩልነ፡ ወንትዋገዝ፡
 በበይናቲነ፡ ከመ፡ ኢንሚግ፡ ለዛቲ፡ ምክር፡ ወንግበራ፡ ለዛቲ፡ ምክር፡ ግብረ፡ ።
 አሜሃ፡ መሐሉ፡ ኩሎሙ፡ ኅቡረ፡ ወአውገዙ፡ ኩሎሙ፡ በበይናቲሆሙ፡
 ቦቱ፡ ወኮነ፡ ኩሎሙ፡ ፪፻፡ ።
 ወወረዱ፡ ውስተ፡ አርዲስ፡ ዝውእቱ፡ ድማሐ፡ ለደብረ፡ አርሞን፡ ጸውዕዎ፡ ለደብረ፡
 አርሞን፡ እስመ፡ መሐሉ፡ ቦቱ፡ ወአውገዙ፡ በበይናቲሆሙ፡ ።
 ወዝንቱ፡ አስማቲሆሙ፡ ለመላእክቲሆሙ፡ ስምያዛ፡ ዘውእቱ፡ መልአኮሙ፡
 ኡራኪበራሜኤል፡ አኪበኤል፡ ጣሚኤል፡ ራሙኤል፡ ዳንኤል፡ ኤዜቄኤል፡ ሰራቂያል፡
 አሳኤል፡ አርምርስ፡ በጥረአል፡ አናንኢ፡ ዘቄቤ፡ ሰምሳዌኤል፡ ሰርተኤል፡ ጡርኤል፡
 ዮምያኤል፡ አራዝያል፡ እሉ፡ እሙንቱ፡ ሀበይቶሙ፡ ለ፪፻ መላእክት፡ ወበዕዳን፡ ኩሉ፡
 ምስሌሆሙ፡ ።

ክፍል፡ ፪።

ወነሥኡ፡ ሎሙ፡ አንስትያ፡ ወኅረየ፡ ኩሉ፡ ለለርእሱ፡ አሐተ፡ አሐተ፡ ወወጠኑ፡ ይባኡ፡
 ኅቤሆን፡ ወተደመሩ፡ ምስሌሆን፡ ወመሐርዎን፡ ሥራያተ፡ ወስብዓታተ፡ ወመቲረ፡
 ሥርው፡ ወዕፀው፡ አመርዎን፡ ።
 ወእማንቱሰ፡ ፀንሳ፡ ወወለዳ፡ ረዓይተ፡ ዐበይተ፡ ወቆሞሙ፡ በበ፴፻ በእመት፡ ።
 እሉ፡ በልዑ፡ ኩሎ፡ ፃሚ፡ ሰብእ፡ እስከ፡ ስእንዎሙ፡ ሴስዮተ፡ ሰብእ፡ ።

ወተመይጡ፡ ረዓይት፡ ላዕሌሆሙ፡ ይብልዕዎሙ፡ ለሰብእ፡፡ ወወጠኑ፡ የኦብሱ፡ በአዕዋፍ፡
ወዲበ፡ አራዊት፡ ወበዘይትሐወስ፡ ወበዓሣት፡ ወሥጋሆሙ፡ በበይናቲሆሙ፡ ይትባልዑ፡
ወደመ፡ ይስትዩ፡ እምኔሃ፡፡
አሜሃ፡ ምድር፡ ሰከየቶሙ፡ ለዐማፅያን፡፡

ክፍል፡ ፳፡፡

ወአዛዝኤል፡ መሐሮሙ፡ ለሰብእ፡ ገቢረ፡ አስይፍት፡ ወመጥባሕት፡ ወወልታ፡ ወድርዓ፡
እንግድዓ፡ ወአርአዮሙ፡ ዘእምድኅሬሆሙ፡ ወምግባረሆሙ፡ አውቃፋተ፡ ወሠርጐ፡
ወተኩሕሎተ፡ ወአሠንዮ፡ ቀራንብት፡ ወእብነ፡ እምኩሉ፡ እብን፡ ክቡረ፡ ወኅሩዮ፡
ወኩሎ፡ ጥምዓታተ፡ ኅብር፡ ወተውላጠ፡ ዓለም፡፡
ወኮነ፡ ርስዐት፡ ዓቢይ፡ ወብዙኅ፡ ዘምዎ፤ ወስሕቱ፡ ወማሰና፡ ኩሉ፡ ፍናዊሆሙ፡፡
አሜዛራክ፡ መሀረ፡ ኩሎ፡ መሳብዕያነ፡ ወመታርያነ፡ ሥርዋት፤ አርማሮስ፡ ፈትሐ፡
ስብዓታተ፤ ወበረቅዓል፡ ረዓይያነ፡ ከዋክብት፤ ወኮከብኤል፡ ትእምርታተ፤ ወጥምኤል፡
መሀረ፡ ራእየ፡ ኮከብ፤ ወአስራድኤል፡ መሀረ፡ ሩፀተ፡ ወርኅ፡፡
ወበኅጉለተ፡ ሰብእ፡ ጸርሐ፡ ወበጽሐ፡ ቃሎሙ፡ ሰማየ፡፡

ክፍል፡ ፱፡፡

ወአሜሃ፡ ሐወጹ፡ ሚካኤል፡ ወገብርኤል፡ ወሱርያን፡ ወኡርያን፡ እምሰማይ፡ ወርእዩ፡
ብዙኃ፡ ደመ፡ ዘይትከዐው፡ በዲበ፡ ምድር፡ ወኩሎ፡ ዓመፃ፡ ዘይትገበር፡ በዲበ፡ ምድር፡፡
ወይቤሉ፡ በበይናቲሆሙ፡ ቃለ፡ ጽራታቲሆሙ፡ ዕራቃ፡ ጸርኅት፡ ምድር፡ እስከ፡ አንቀጸ፡
ሰማይ፡፡
ወይእዜኒ፡ ለክሙ፡ አቅዱሳነ፡ ሰማይ፡ ይሰክዩ፡ ነፍሳተ፡ ሰብእ፡ እንዘ፡ ይብሉ፡ አብኡ፡
ለነ፡ ፍትሐ፡ ኅበ፡ ልዑል፡፡
ወይቤሉ፡ ለእግዚአሙ፡ ለንጉሥ፡ እስመ፡ እግዚአሙ፡ ለአጋእዝት፡ ወአምላኩሙ፡
ለአማልክት፡ ወንጉሥሙ፡ ለነገሥት፡ ወመንበረ፡ ስብሐቲክ፡ ውስተ፡ ኩሎ፡ ትውልደ፡
ዓለም፡ ወስምከ፡ ቅዱስ፡ ወስቡሕ፡ ውስተ፡ ኩሎ፡ ትውልደ፡ ዓለም፡ ወቡሩክ፡ ወስቡሕ፡
አንተ፡፡
ገበርክ፡ ኩሎ፡ ወሥልጣነ፡ ኩሎ፡ ምስሌክ፡ ወኩሎ፡ ክሡት፡ ቅድሜክ፡ ወግሁድ፤
ወአንተ፡ ትሬኢ፡ ኩሎ፡ ወአልቦ፡ ዘይትከሀል፡ ይትኅባእ፡ እምኔክ፡፡
ርኢኬ፡ ዘገብረ፡ አዛዝኤል፡ ዘከመ፡ መሀረ፡ ኩሎ፡ ዓመፃ፡ በዲበ፡ ምድር፡ ወአግሀደ፡
ኅቡአተ፡ ዓለም፡ እለ፡ ይትገበራ፡ በሰማያት፡፡ ወአመረ፡ ስብዐታተ፡ ስምያዛ፡ ዘአንተ፡
ወሀብኮ፡ ሥልጣነ፡ ይኩንን፡ እለ፡ ምስሌሁ፡ ኅቡረ፡፡
ወሐሩ፡ ኅበ፡ አዋልደ፡ ሰብእ፡ ኅቡረ፡ ወሰከቡ፡ ምስሌሆን፡ ምስለ፡ እልኩ፡ አንስት፡
ወረኩሱ፡ ወአግሀዱ፡ ሎን፡ እሎንተ፡ ኃጣውአ፡፡
ወአንስትሰ፡ ወለዳ፡ ረዓይተ፡ ወበዝ፡ መልአት፡ ኩላ፡ ምድር፡ ደመ፡ ወዐመፃ፡፡
ወይእዜኒ፡ ናሁ፡ ይጸርሐ፡ ነፍሳት፡ እለ፡ ሞቱ፡ ወይሰክዩ፡ እስከ፡ አንቀጸ፡ ሰማይ፡
ወዐርገ፡ ገዓሮሙ፡ ወኢይክሉ፡ ወዲአ፡ እምቅድመ፡ ገጸ፡ ዐመፃ፡ ዘይትገበር፡ በዲበ፡
ምድር፡፡
ወአንተ፡ ተአምር፡ ኩሎ፡ ዘእንበለ፡ ይኩን፤ ወአንተ፡ ተአምር፡ ዘንተ፡ ወዘዚአሆሙ፡
ወአልቦ፡ ዘትነግረኅ፡ ወምንት፡ መፍትው፡ ንረስዮሙ፡ በእንተ፡ ዝንቱ፡፡

ክፍል፡ ፲፡፡

ወአሜሃ፡ ልዑል፡ ዐቢይ፡ ወቅዱስ፡ ተናገረ፡ ወፈነዎ፡ ለአርስየላልዩር፡ ኅበ፡ ወልደ፡
ላሜክ፡ ወይቤሉ፡፡
በሎ፡ በስመ፡ ዚአቶ፡ ኅባእ፡ ርእሰክ፡ ወአግሀድ፡ ሎቱ፡ ፍጻሜ፡ ዘይመጽእ፡ እስመ፡
ትትሐጐል፡ ምድር፡ ኩላ፡ ወማየ፡ አይኅ፡ ይመጽእ፡ ሀሎ፡ ዲበ፡ ኩላ፡ ምድር፡
ወይትኅጐል፡ ዘሀሎ፡ ውስቴታ፡፡
ወይእዜኒ፡ መሀሮ፡ ከመ፡ ይንፍጽ፡ ወይንበር፡ ዘርኡ፡ ለኩሉ፡ ምድር፡፡

ወይቤሎ፡ካዕበ፡እግዚእ፡ለሩፋኤል፡እስሮ፡ለአዛዝኤል፡በእዴሁ፡ወእገሪሁ፡ወደዮ፡
 ውስተ፡ጽልመት፡ወአብቅዋ፡ለገዳም፡እንተ፡ሀለውት፡በዱዳኤል፡ወደዮ፡ህየ።
 ወደይ፡ሳዕሌሁ፡አዕባነ፡ጠዋያተ፡ወበሊኃተ፡ወክድኖ፡ጽልመተ፡ወህየ፡ይኅድር፡
 ለዓለም፡ወክድኖ፡ለገጹ፡ከመ፡ኢይርአይ፡ብርሃነ።
 ወበዕለት፡ዐባይ፡እንተ፡ኩነኔ፡ከመ፡ይትፈነው፡ውስተ፡ዋዕይ።
 ወአሕይዋ፡ለምድር፡እንተ፡አማሰኑ፡መላእክት፡ወሕይወታ፡ለምድር፡አይድዕ፡ከመ፡
 አሐይዋ፡ለምድር፡ወኢይትኃጉሉ፡ኩሎሙ፡ውሉደ፡ሰብእ፡በምሥጢር፡ኩሉ፡
 ዘቀተሉ፡ትጉሃን፡ወመሀሩ፡ለውሉደሙ።
 ወማሰነት፡ኩላ፡ምድር፡በትምህርተ፡ግብሩ፡ለአዛዝኤል፡ወሳዕሌሁ፡ጸሐፍ፡ኩሎ፡
 ኀጢአተ።
 ወለገብርኤል፡ይቤሎ፡እግዚአብሔር፡ሐር፡ደቤሆሙ፡ለመንዝራን፡ወለምኑናን፡
 ወደብ፡ውሉደ፡ዘማ፡ወአኅጉሎሙ፡ለውሉደ፡ዘማ፡ወለውሉደ፡ትጉሃን፡እምሰብእ፡
 ወአውፅአሙ፡ወፈንዎሙ፡በበይናቲሆሙ፡እሙንቱ፡ወለሊሆሙ፡በቀትል፡ይትኀጉሉ፡
 እስመ፡ኑኃ፡መዋዕል፡አልቦሙ።
 ወኩሎሙ፡ይስእሉከ፡ወኢይከውን፡ለአበዊሆሙ፡በእንቲአሆሙ፡እስመ፡ይሴፈው፡
 ሕይወተ፡ዘለዓለም፡ወከመ፡ይሕየው፡እምኔሆሙ፡፩፻ ክራማተ።
 ወለሚካኤል፡ይቤሎ፡እግዚአብሔር፡አይድዕ፡ለስምያዛ፡ወለካልአን፡እለ፡ምስሌሁ፡
 እለ፡ኀብሩ፡ምስለ፡አንስት፡ከመ፡ይማሰኑ፡ምስሌሆን፡በኩሉ፡ርኩሰ፡ዚአሆን።
 ሰባ፡ይትራገዙ፡ኩሉ፡ውሉደሙ፡ወሰባ፡ይሬእዩ፡ሐጉሎሙ፡ለፍቁራኒሆሙ፡
 እስሮሙ፡ለ፪ ትውልድ፡በመትሕተ፡አውግረ፡ምድር፡እስከ፡ዕለተ፡ኩነኔሆሙ፡
 ወተፍጻሜቶሙ፡እስከ፡ይትፌጸም፡ኩነኔ፡ዘለዓለመ፡ዓለም።
 ወበውእቱ፡መዋዕል፡ይወስድዎሙ፡ውስተ፡መትሕተ፡እሳት፡በዓዕር፡ወበቤተ፡ሞቅሕ፡
 ይትዓፀው፡ለዓለመ፡ዓለም።
 ወሶቤሃ፡ይውዒ፡ወይማሰን፡እምይእዜ፡ምስሌሆሙ፡ኅቡረ፡ይትአሰሩ፡እስከ፡
 ተፍጻሜተ፡ትውልደ፡ትውልድ።
 ወአኅጉሎሙ፡ለኩሎሙ፡ነፍሳተ፡ተውኔት፡ወለውሉደሙ፡ለትጉሃን፡እስመ፡
 ገፍዕዎሙ፡ለሰብእ።
 አኅጉል፡ኩሎ፡ግፍዐ፡እምገጸ፡ምድር፡ወኩሉ፡ምግባር፡እኩይ፡ይኅልቅ፡
 ወያስተርኢ፡ተክለ፡ጽድቅ፡ወርትዕ፡ወይከውን፡ለበረከት፡ግብር፤ጽድቅ፡ወርትዕ፡
 ለዓለም፡በፍሥሐ፡ይተክሉ።
 ወይእዜኒ፡ኩሎሙ፡ጸድቃን፡ይገንዩ፡ወይከውኑ፡ሕያዋነ፡እስከ፡ይወልዱ፡፲፻
 ወኩሎ፡መዋዕለ፡ውርዙቶሙ፡ወሰንበተ፡ዚአሆሙ፡ይፌጽሙ፡በሰላም።
 ወበእማንቱ፡መዋዕል፡ትትገበር፡ኩላ፡ምድር፡በጽድቅ፡ወኩለንታሃ፡ትተክል፡ዕፀው፡
 ወትመልዕ፡በረከተ።
 ወኩሎ፡ዕፀው፡ኃሄት፡ይተክሉ፡ደቤሃ፡ወይተክሉ፡ደቤሃ፡እውያነ፡ወወይን፡
 ዘይተክል፡ደቤሃ፡ይገብር፡ፍሬ፡ለጽጋብ፤ወኩሉ፡ዘርእ፡ዘይዘራእ፡ደቤሃ፡አሐቲ፡
 መስፈርት፡ትገብር፡እልፈ፡ወአሐቲ፡መስፈርተ፡ኤልያስ፡ትገብር፡፲ ምክያዳተ፡
 ዘይት።
 ወአንተ፡አንጽሐ፡ለምድር፡እምኩሉ፡ግፍዕ፤ወእምኩሉ፡ዐመፃ፤ወእምኩሉ፡
 ኀጢአት፤ወእምኩሉ፡ረሲዕ፤ወእምኩሉ፡ርኩሰ፡ይትገበር፡በደብ፡ምድር፤
 አኅልቆሙ፡እምደብ፡ምድር።
 ወይኩኑ፡ኩሉ፡ውሉደ፡ሰብእ፡ጸድቃነ፡ወይኩኑ፡ኩሉ፡አሕዛብ፡ያምልኩ፡
 ወይባርኩ፡ኪያየ፡ወኩሎሙ፡ሊተ፡ይሰግዱ።
 ወትነጽሕ፡ምድር፡እምኩሉ፡ሙስና፡ወእምኩሉ፡ኃጢአት፤ወእምኩሉ፡
 መቅሠፍት፤ወእምኩሉ፡ዓዕር፤ወኢይደግም፡ከመ፡እፈኑ፡ደቤሃ፡አይኃ፡ለትውልደ፡
 ትውልድ፡ወእስከ፡ለዓለም።

ክፍል : ፲፩ ፡፡

ወበእማንቱ ፡ መዋዕል ፡ እፈትሕ ፡ መዛግብተ ፡ በረከት ፡ እለ ፡ በሰማይ ፡ ከመ ፡ አውርዶሙ ፡
ዲበ ፡ ምድር ፡ ዲበ ፡ ግብረሙ ፡ ወዲበ ፡ ማሆሙ ፡ ለውሉደ ፡ ሰብእ ፡፡
ሰላም ፡ ወርትዐ ፡ ሱቱፋነ ፡ ይከውኑ ፡ በኩሉ ፡ መዋዕለ ፡ ዓለም ፡ ወበኩሉ ፡ ትውልደ ፡
ዓለም ፡፡

ምዕራፍ : ፫ ፡፡

ክፍል : ፲፪ ፡፡

ወእምቅድመ ፡ ኩሉ ፡ ነገር ፡ ተከብተ ፡ ሄኖክ ፡ ወአልቦ ፡ ዘየአምሮ ፡ እምውሉደ ፡ ሰብእ ፡
ቦኅበ ፡ ተከብተ ፡ ወኅበ ፡ ሀሎ ፡ ወምንተ ፡ ኮነ ፡፡
ወኩሉ ፡ ግብሩ ፡ ምስለ ፡ ቅዱሳን ፡ ወምስለ ፡ ትጉሃን ፡ በመዋዕለ ፡ ዚአሁ ፡፡
ወአነ ፡ ሄኖክ ፡ ኮንኩ ፡ እባርኮ ፡ ለእግዚእ ፡ ዐቢይ ፡ ወለንጉሠ ፡ ዓለም ፡ ወናሁ ፡ ትጉሃን ፡
ይጸውዑኒ ፡ ሊተ ፡ ለሄኖክ ፡ ጸሓፊ ፡ ወይቤሉኒ ፡፡
ሄኖክ ፡ ጸሓፊ ፡ ጽድቅ ፡ ሑር ፡ አይድዕ ፡ ለትጉሃን ፡ ሰማይ ፡ እለ ፡ ኀደጉ ፡ ሰማየ ፡ ልዑለ ፡
ወምቅዋመ ፡ ቅዱስ ፡ ዘለዓለም ፡ ወምስለ ፡ አንስት ፡ ማሰኑ ፡ ወገብሩ ፡ ዘከመ ፡ ይገብሩ ፡
ውሉደ ፡ ሰብእ ፡ ወነሥኡ ፡ ሎሙ ፡ አንስተ ፡ ወማሰኑ ፡ ዐቢየ ፡ ሙስና ፡ በዲበ ፡ ምድር ፡፡
ወኢይከውን ፡ ሎሙ ፡ በዲበ ፡ ምድር ፡ ሰላም ፡ ወኀደገተ ፡ ኀጢአት ፡ እስመ ፡
ኢይትፌሥሑ ፡ በውሉደሙ ፡፡
ቀትለ ፡ ፍቁራኒሆሙ ፡ ይፊእዩ ፡ ወዲበ ፡ ሐጉለ ፡ ውሉደሙ ፡ ይግዕሩ ፡ ወይስእሉ ፡
ለዓለም ፡ ወኢይከውን ፡ ሎሙ ፡ ምሕረት ፡ ወኢሰላም ፡፡

ክፍል : ፲፫ ፡፡

ወሄኖክ ፡ ኀሊፎ ፡ ይቤሎ ፡ ለአዝዝኤል ፡ ኢይከውኑከ ፡ ሰላም ፡ ዐቢይ ፡ ኩነኔ ፡ ወፅእ ፡ ሳዕሌከ ፡
ይእሥርከ ፡፡
ወሣኅት ፡ ወስእለት ፡ ወምሕረት ፡ ኢይከውኑከ ፡ በእንተ ፡ ዘመሀርከ ፡ ግፍዐ ፡ ወበእንተ ፡
ኩሉ ፡ ምግባረ ፡ ጽርፊት ፤ ወግፍዕ ፤ ወኀጢአት ፤ ዘአርአይከ ፡ ለውሉደ ፡ ሰብእ ፡፡
አሜሃ ፡ ሐዊርየ ፡ ነገርክዎሙ ፡ ለኩሎሙ ፡ ኀቡረ ፤ ወእሙንቱ ፡ ፈርሁ ፡ ኩሎሙ ፡
ፍርሃት ፡ ወረዓድ ፡ ነሥኡሙ ፡፡
ወተስእሉኒ ፡ ተዝካረ ፡ ስእለት ፡ ከመ ፡ እጽሐፍ ፡ ሎሙ ፡ ከመ ፡ ይኩኖሙ ፡ ኀደገተ ፡ ወከመ ፡
አነ ፡ አዕርግ ፡ ተዝካረ ፡ ስእለቶሙ ፡ ኀበ ፡ እግዚአብሔር ፡ ሰማየ ፡፡
እስመ ፡ ኢይክሉ ፡ እሙንቱ ፡ እምይእዜ ፡ ተናግሮ ፡ ወኢያነሥኡ ፡ አዕይንቲሆሙ ፡ ውስተ ፡
ሰማይ ፡ እምኃፍረተ ፡ አበሳሆሙ ፡ ዘተኩነኑ ፡፡
ወአሜሃ ፡ ጸሐፍኩ ፡ ተዝካረ ፡ ስእለቶሙ ፡ ወአስተብቀኦቶሙ ፡ በእንተ ፡ መንፈሶሙ ፡
ወለለ ፡ ፩ ምግባረሙ ፡ ወበእንተ ፡ ዘይስእሉ ፡ ከመ ፡ ይኩኖሙ ፡ ስርየተ ፡ ወኑኀተ ፡፡
ወሐዊርየ ፡ ነበርኩ ፡ ዲበ ፡ ማያተ ፡ ዳን ፡ በዳን ፡ እንተ ፡ ይእቲ ፡ እምየማነ ፡ ዓረበ ፡ አርሞን ፡
ወእነብብ ፡ ተዝካረ ፡ ስእለቶሙ ፡ እስከ ፡ ደቀስኩ ፡፡
ወናሁ ፡ ሕልም ፡ መጽአኒ ፡ ወራእያት ፡ ዲቤየ ፡ ወድቁ ፡ ወርኢኩ ፡ ራእየ ፡ መቅሠፍት ፡
እንግር ፡ ለውሉደ ፡ ሰማይ ፡ ወእዛለፎሙ ፡፡
ወነቂሕየ ፡ መጻእኩ ፡ ኀቤሆሙ ፡ ወኩሎሙ ፡ ጉቡዓነ ፡ ይነብሩ ፡ እንዘ ፡ ላሕው ፡
በኡብልስያኤል ፡ ዘሀለወት ፡ ማእከለ ፡ ሊባኖስ ፡ ወሴኔሴር ፡ እንዘ ፡ ግልቡባን ፡ ገጾሙ ፡፡
ወተናገርኩ ፡ በቅድሜሆሙ ፡ ኩሎ ፡ ራእያተ ፡ ዘርኢኩ ፡ በንዋምየ ፡ ወጠንኩ ፡ እትናገር ፡
ውእተ ፡ ቃላተ ፡ ጽድቅ ፡ ወእዝልፍ ፡ ለትጉሃን ፡ ሰማይ ፡፡

ክፍል : ፲፬ ፡፡

ዝመጽሐፍ ፡ ቃለ ፡ ጽድቅ ፡ ወዘለፋ ፡ ትጉሃን ፡ እለ ፡ እምዓለም ፡ በከመ ፡ አዘዘ ፡ ቅዱስ ፡
ወዐቢይ ፡ በይእቲ ፡ ራእይ ፡ አነ ፡ ርኢኩ ፡ በንዋምየ ፡ ዘአነ ፡ ይእዜ ፡ እንግር ፡ በልሳን ፡ ዘሥጋ ፡
ወበመንፈስየ ፡ ዘወሀበ ፡ ዐቢይ ፡ አፈ ፡ ለሰብእ ፡ ይትናገሩ ፡ ቦቱ ፡ ወይለብው ፡ በልብ ፡፡

ከመፈጠረ፡ ወወሀበ፡ ለሰብእ፡ ይለብው፡ ቃለ፡ አእምሮ፡ ወሊተኒ፡ ፈጠረ፡ ወወሀበኒ፡
 እዛለፎሙ፡ ለትጉሃን፡ ውሉደ፡ ሰማይ።
 አነ፡ ስእለተክሙ፡ ጸሐፍኩ፡ ወበራእይየ፡ ከመዝ፡ ያስተርኢ፡ እስመ፡ ስእለተክሙ፡
 ኢትከውነክሙ፡ ውስተ፡ ኩሉ፡ መዋዕለ፡ ዓለም፡ ወኩነኔ፡ ፍጽምት፡ ላዕሌክሙ፡
 ወኢይከውነክሙ።
 ወእምይእዜ፡ ኢተዓርጉ፡ ውስተ፡ ሰማይ፡ እስከ፡ ኩሉ፡ ዓለም፡ ወውስተ፡ ምድር፡ ተነግ
 ረ፡ ይእሥርክሙ፡ በኩሉ፡ መዋዕለ፡ ዓለም።
 ወእምቅድመ፡ ዝንቱ፡ ርኢክሙ፡ ኅጉለ፡ ውሉድክሙ፡ ፍቁራን፤ ወአልብክሙ፡
 ጥራያኒሆሙ፡ አላ፡ ይወድቁ፡ ቅድሜክሙ፡ በሰይፍ።
 ወስእለተክሙ፡ በእንቲአሆሙ፡ ኢይከውን፡ ወበእንቲአክሙኒ፡ ወአንትሙሂ፡ እንዘ፡
 ትበክዩ፡ ወታስተበቀሁ፡ ወኢትትናገሩ፡ ወኢምንተኒ፡ ቃለ፡ እምውስተ፡ መጽሐፍ፡
 ዘጸሐፍኩ።
 ወሊተ፡ ከመዝ፡ ራእይ፡ አስተርአየኒ፤ ናሁ፡ ደመናት፡ በራእይ፡ ይጼውዑኒ፤ ወጊሜ፡
 ይጼውዑኒ፤ ወሩፀተ፡ ከዋክብት፡ ወመባርቅት፡ ያጌጉዑኒ፡ ወያጽዕቂኒ፡ ወነፋሳት፡
 በራእይ፡ ያሰርሩኒ፡ ወያጌጉዑኒ።
 ወነሥኡኒ፡ ላዕለ፡ ውስተ፡ ሰማይ፡ ወቦእኩ፡ እስከ፡ እቀርብ፡ ኅበ፡ ጥቅም፡ ዘኅንጽት፡
 በእብነ፡ በረድ፡ ወልሳነ፡ እሳት፡ የዓውዳ፡ ወወጠነ፡ ያፍርሀኒ።
 ወቦእኩ፡ ውስተ፡ ልሳነ፡ እሳት፡ ወቀረብኩ፡ ኅበ፡ ቤት፡ ዓቢይ፡ ዘሕኑጽ፡ በአዕባነ፡ በረድ፤
 ወአረፍተ፡ ውእቱ፡ ቤት፡ ከመ፡ ጸፍጸፈ፡ ሰሌዳ፡ በአዕባነ፡ ዘእምበረድ፡ ወምድሩ፡ በረድ።
 ጠፈሩ፡ ከመ፡ ሩፀተ፡ ከዋክብት፡ ወመባርቅት፤ ወማእከሎሙ፡ ኪሩቤል፡ ዘእሳት፡
 ወሰማዮሙ፡ ማይ።
 ወእሳት፡ ዘይነድድ፡ በዓውዳ፡ አረፍቱ፡ ወኖሳቱ፡ ይውዒ፡ በእሳት።
 ወቦእኩ፡ ውስተ፡ ውእቱ፡ ቤት፡ ወምውቅ፡ ከመ፡ እሳት፡ ወቁሪር፡ ከመ፡ በረድ፡
 ወኢምንተኒ፡ ፍግፍ፡ ወሕይወት፡ አልቦ፡ ውስቴቱ፤ ፍርሃት፡ ከደነኒ፡ ወረዓድ፡ አኅዘኒ።
 ወእንዘ፡ እትሀወክ፡ ወእርዕድ፡ ወደቁ፡ በገጽዮ፡ ወእሬኢ፡ በራእይ።
 ወናሁ፡ ካልእ፡ ቤት፡ ዘየዐቢ፡ እምዝኩ፡ ወኩሉ፡ ኖሳቱ፡ ርኑት፡ በቅድሜየ፡ ወኅኑጽ፡
 በልሳነ፡ እሳት።
 ወበኩሉ፡ ይራደፍድ፡ በሰብሐት፡ ወበክብር፡ ወዕበይ፡ እስከ፡ ኢይክል፡ ዜንዎተክሙ፡
 በእንተ፡ ስብሐቲሁ፡ ወበእንተ፡ ዐበዩ።
 ወምድሩሰ፡ እሳት፡ ወመልዕልቴሁ፡ መብረቅ፡ ወምርዋፀ፡ ከዋክብት፡ ወጠፈሩኒ፡ እሳት፡
 ዘይነድድ።
 ወነጸርኩ፡ ወርኢኩ፡ ውስቴቱ፡ መንበረ፡ ልዑለ፤ ወራእዩ፡ ከመ፡ አስተትያ፡ ወክበቡ፡ ከመ፡
 ፀሐይ፡ ዘያበርህ፡ ወቃለ፡ ኪሩቤል።
 ወእመትሕተ፡ መንበሩ፡ ዐቢይ፡ ይወፅእ፡ አፍላገ፡ እሳት፡ ዘይነድድ፤ ወኢይክሉ፡ ርእዮቶ።
 ወዐቢየ፡ ስብሐት፡ ይነብር፡ ላዕሌሁ፡ ወዐጽፋሰ፡ ዘይበርህ፡ እምፀሐይ፡ ወይፀዐዱ፡
 እምኩሉ፡ በረድ።
 ወኢይክል፡ ወኢመኑሂ፡ እመላእክት፡ በዊኦ፤ ወራእዩ፡ ገጹ፡ ለክቡር፡ ወስቡሕ፡ ኢይክል፡
 ወኢመኑሂ፡ ዘሥጋ፡ ይርእይ፡ ኪሆሁ።
 እሳተ፡ እሳት፡ ዘይነድድ፡ በዓውዳ፡ ወእሳት፡ ዐቢይ፡ ይቀውም፡ ቅድሜሁ፡ ወአልቦ፡
 ዘይቀርብ፡ ኅቤሁ፡ እምእለ፡ ዓውዱ፡ ትእልፊተ፡ ትእልፊት፡ ቅድሜሁ፡ ወውእቱሰ፡
 ኢይፈቅድ፡ ምክረ፡ ቅድስተ።
 ወቅዱሳን፡ እለ፡ ይቀርቡ፡ ኅቤሁ፡ ኢይርሳቁ፡ ሌሊተ፡ ወመዓልተ፡ ወኢይትአተቱ፡
 እምኔሁ።
 ወአነ፡ ሀለውኩ፡ እስከ፡ ዝንቱ፡ ደብ፡ ገጽዮ፡ ግልባቤ፡ እንዘ፡ እርዕዱ፡ ወእግዚእ፡ በአፋሁ፡
 ጸውዐኒ፡ ወይቤለኒ፡ ቅረብ፡ ዝየ፡ ሄኖክ፡ ወለቃልየ፡ ቅዱስ።
 ወአንሥኢ፡ ወአቅረብኒ፡ እስከ፡ ኖሳት፤ ወአንሰ፡ ገጽዮ፡ ታሕተ፡ እኔጽር።

ክፍል፡ ፲፭።

ወአውሥኢ፡ ወይቤለ፡ በቃሉ፡ ሰማዕ፡ ኢትፍራህ፡ ሄኖክ፡ ብእሲ፡ ጸድቅ፡ ወጸሐፌ፡
 ጸድቅ፡ ቅረብ፡ ዝዮ፡ ወስማዕ፡ ቃልዮ፡፡
 ወሐር፡ በሎሙ፡ ለትጉሃነ፡ ሰማይ፡ እለ፡ ፈነውከ፡ ትስኣል፡ በእንቲአሆሙ፡ አንትሙ፡
 መፍትሔ፡ ትስኣሉ፡ በእንተ፡ ሰብእ፡ ወአኮ፡ ሰብእ፡ በእንቲአክሙ፡፡
 በእንተ፡ ምንት፡ ጎደግሙ፡ ሰማየ፡ ልዑለ፡ ወቅዱሰ፡ ዘለዓለም፡ ወምስለ፡ አንስት፡
 ሰከብክሙ፡ ወምስለ፡ አዋልደ፡ ሰብእ፡ ረከሰክሙ፡ ወነሣእክሙ፡ ለክሙ፡ አንስተ፡ ወከሙ፡
 ውሉደ፡ ምድር፡ ገበርክሙ፡ ወወለድክሙ፡ ውሉደ፡ ረዓይተ፡፡
 ወአንትሙሰ፡ መንፈሳውያን፡ ቅዱሳን፡ ሕያዋን፡ ሕይወት፡ ዘለዓለም፡ በዲበ፡ አንስት፡
 ረከሰክሙ፡ ወበደመ፡ ሥጋ፡ አውለድክሙ፡ ወበደመ፡ ሰብእ፡ ፈተውክሙ፡ ወገበርክሙ፡
 ከመ፡ እሙንቱ፡ ይገብሩ፡ ሥጋ፡ ወደመ፡ እለ፡ እሙንቱ፡ ይመውቱ፡ ወይትጎጡሉ፡፡
 ወበእንተዝ፡ ወሀብክሙ፡ አንስትያ፡ ከመ፡ ይዝርኩ፡ ላዕሌሆን፡ ወይትወለዱ፡ ውሉደ፡
 በላዕሌሆን፡ ከመ፡ ከማሁ፡ ይትገበር፡ ግብር፡ በዲበ፡ ምድር፡፡
 ወአንትሙሰ፡ ቀዳሚ፡ ኮንክሙ፡ መንፈሳውያን፡ ሕያዋን፡ ሕይወት፡ ዘለዓለም፡
 ዘኢይመውት፡ ለኩሉ፡ ትውልደ፡ ዓለም፡፡
 ወበእንተ፡ ዝንቱ፡ ኢረሰይኩ፡ ለክሙ፡ አንስትያ፡ እስመ፡ መንፈሳውያንሰ፡ ውስተ፡ ሰማይ፡
 ማኅደሪሆሙ፡፡
 ወይእኬኒ፡ ረዓይት፡ እለ፡ ተወልዱ፡ እምነፍስት፡ ወሥጋ፡ መናፍስተ፡ እኩያነ፡ ይሰመዩ፡
 በዲበ፡ ምድር፡ ወውስተ፡ ምድር፡ ይከውን፡ ማኅደሪሆሙ፡፡
 ወነፍሳት፡ እኩያን፡ ወፅኡ፡ እምሥጋሆሙ፡ እስመ፡ እመልዕልት፡ ተፈጥሩ፡ እምቅዱሳን፡
 ትጉሃን፡ ኮኑ፡ ቀዳሚቶሙ፡ ወቀዳሚ፡ መሰረት፡ መንፈሰ፡ እኩየ፡ ይከውኑ፡ በዲበ፡
 ምድር፡ ወመንፈሰ፡ እኩያን፡ ይሰመዩ፡፡
 ወመናፍስተ፡ ሰማይ፡ ውስተ፡ ሰማይ፡ ይከውን፡ ማኅደሪሆሙ፡ ወመናፍስተ፡ ምድር፡ እለ፡
 ተወልዱ፡ በዲበ፡ ምድር፡ ውስተ፡ ምድር፡ ማኅደሪሆሙ፡፡
 ወመንፈሰ፡ ረዓይት፡ ደመናተ፡ እለ፡ ይገፍዱ፡ ይማስኑ፡ ወይወድቁ፡ ወይትበዕሱ፡፡
 ወያደቅቁ፡ ዲበ፡ ምድር፡ ወጎዘነ፡ ይገብሩ፡ ወኢምንተኒ፡ ዘይበልዑ፡ እክለ፡፡
 ወኢይጸምዑ፡ ወኢይትዓወቁ፡፡
 ወኢይትነሥኡ፡ እሎንቱ፡ ነፍሳት፡ ዲበ፡ ውሉደ፡ ሰብእ፡ ወዲበ፡ አንስት፡ እስመ፡
 ወፅኡ፡ አመ፡ መዋዕለ፡ ቀትል፡ ወሙስና፡፡

ክፍል፡ ፲፮፡፡

ወሞተ፡ ረዓይትኒ፡ እንተ፡ ጎበ፡ ወፅኡ፡ መንፈሳት፡
 እምነፍስት፡ ሥጋሆሙ፡ ለይኩን፡ ዘይማስን፡ ዘእንበለ፡ ኩነኔ፡ ከማሁ፡ ይማስኑ፡ እስከ፡
 ዕለተ፡ ኩነኔ፡ ዐባይ፡ እምዓለም፡ ዐቢይ፡ ይትፌጸም፡ እምትጉሃን፡ ወረሲዓን፡፡
 ወይእኬኒ፡ ለትጉሃን፡ እለ፡ ፈነውከ፡ ትስኣል፡ በእንቲአሆሙ፡ እለ፡ ቀዲሙ፡ በሰማይ፡
 ሀለው፡፡
 ወእእኬኒ፡ አንትሙሰ፡ በሰማይ፡ ሀለውክሙ፡ ወጎቡኣት፡ ዓዲ፡ ኢተከሥቱ፡ ለክሙ፡
 ወምኑነ፡ ምሥጢረ፡ አእመርክሙ፡ ወዘንተ፡ ዜነውክሙ፡ ለአንስት፡ በጽንዐ፡ ልብክሙ፡
 ወበዝንቱ፡ ምሥጢር፡ ያበዝኃ፡ አንስት፡ ወሰብእ፡ እኪተ፡ በዲበ፡ ምድር፡፡
 በሎሙ፡ እንከሰ፡ አልብክሙ፡ ሰላም፡፡

ምዕራፍ፡ ፩፡፡

ክፍል፡ ፲፯፡፡

ወነሥኡኒ፡ ውስተ፡ ፩ መካን፡ ጎበ፡ ሀለው፡ ህዮ፡ ከመ፡ እሳት፡ ዘይነድድ፡ ወሰበ፡ ይፈቅዱ፡
 ያስተርእዩ፡ ከመ፡ ሰብእ፡፡
 ወወሰደኒ፡ ውስተ፡ መካን፡ ዘዐውሎ፡ ወውስተ፡ ደብር፡ ዘከተማ፡ ርእሱ፡ ይበጽሕ፡
 ውስተ፡ ሰማይ፡፡

ወርኢኩ፡ መካናተ፡ ብሩሃነ፡ ወነጐድጓድ፡ ውስተ፡ አጽናፍ፤ ጎበ፡ ዕመቁ፡ ቀስተ፡ እሳት፤
 ወሐፅ፤ ወምጐንጳቲሆሙ፤ ወሰይፈ፡ እሳት፤ ወመባርቅት፡ ኩሉ፡፡
 ወነሥኡኒ፡ እስከ፡ ማየ፡ ሕይወት፡ ዘይትነገር፡ ወእስከ፡ እሳተ፡ ዓረብ፡ ዘውእቱ፡ ይእሳዝ፡
 ኩሉ፡ ዕርበተ፡ ፀሐይ፡፡
 ወመጸእኩ፡ እስከ፡ ፈለገ፡ እሳት፡ ዘይውሳዝ፡ እሳቱ፡ ከመ፡ ማይ፡ ወይትከዐው፡ ውስተ፡
 ባሕር፡ ዐቢይ፡ ዘመንገለ፡ ዓረብ፡፡
 ወርኢኩ፡ ኩሉ፡ ዐበይተ፡ አፍላገ፡ ወእስከ፡ ዐቢይ፡ ጽልመት፡ በጸሕኩ፡ ወሐርኩ፡ ጎበ፡
 ኩሉ፡ ዘሥጋ፡ ያንሰሱ፡፡
 ወርኢኩ፡ አድባረ፡ ቆባራት፡ እለ፡ ክረምት፡ ወምክዓወ፡ ማይ፡ ዘኩሉ፡ ቀላይ፡፡ ወርኢኩ፡
 አፋሆሙ፡ ለኩሉሙ፡ አፍላገ፡ ምድር፡ ወአፋሃ፡ ለቀላይ፡፡

ክፍል፡ ፲፰፡፡

ወርኢኩ፡ መዛግብተ፡ ኩሉ፡ ነፋሳት፡ ወርኢኩ፡ ከመ፡ ቦሙ፡ አሰርገወ፡ ኩሉ፡ ፍጥረተ፡
 ወመሰረታቲሃ፡ ለምድር፡፡
 ወርኢኩ፡ እብነ፡ ማእዘንተ፡ ምድር፡ ወርኢኩ፡ ፬ ነፋሳተ፡ እለ፡ ይፀውርዋ፡ ለምድር፡
 ወለጽንዐ፡ ሰማይ፡፡
 ወርኢኩ፡ ከመ፡ ነፋሳት፡ ይረብብዋ፡ ለልዕልና፡ ሰማይ፤ ወእሙንቱ፡ ይቀውሙ፡ ማእከለ፡
 ሰማይ፡ ወምድር፡ እሙንቱ፡ ውእቶሙ፡ አዕማደ፡ ሰማይ፡፡
 ወርኢኩ፡ ነፋሳተ፡ እለ፡ ይመይጥዋ፡ ለሰማይ፡ እለ፡ ያዐርቡ፡ ለክበበ፡ ፀሐይ፡ ወኩሉ፡
 ከዋክብተ፡፡
 ወርኢኩ፡ ዘዲበ፡ ምድር፡ ነፋሳተ፡ ዘይፀውሩ፡ ደመናተ፤ ወርኢኩ፡ ፍናወ፡ መላእክት፤
 ርኢኩ፡ ውስተ፡ ጽንፈ፡ ምድር፡ ጽንዐ፡ ዘሰማይ፡ መልዕልተ፡፡
 ወነላፍኩ፡ መንገለ፡ አዜብ፡ ወይነድድ፡ መዓልተ፡ ወሌሊተ፡ ጎበ፡ ጌአድባር፡ ዘእምእብን፡
 ክቡር፡ ፫ መንገለ፡ ጽባሕ፡ ወ ፫ መንገለ፡ አዜብ፡፡
 ወመንገለ፡ ጽባሕሰ፡ ዘእምእብነ፡ ጎብር፡ ወ ፩ ሰ፡ ዘእምእብነ፡ ባሕርይ፡ ወ ፩ ኒ፡
 ዘእምእብነ፡ ፈውስ፡ ወዘመንገለ፡ አዜብ፡ እምነ፡ እብን፡ ቀይሕ፡፡
 ወማእከላይሰ፡ ይጐድእ፡ እስከ፡ ሰማይ፡ ከመ፡ መንበሩ፡ ለእግዚአብሔር፡ ዘእምእብነ፡
 ፔካ፡ ወድማሁ፡ ለመንበር፡ ዘእምእብነ፡ ሰንፔር፡፡
 ወእሳተ፡ ዘይነድድ፡ ርኢኩ፡ ወዘሀሎ፡ ውስተ፡ ኩሉ፡ አድባር፡፡
 ወርኢኩ፡ ህየ፡ መካነ፡ ማዕዶቱ፡ ለዐቢይ፡ ምድር፡ ህየ፡ ይትጋብኡ፡ ማያት፡፡
 ወርኢኩ፡ ንቅዑተ፡ ምድር፡ ዕሙቀ፡ በእእማዲሁ፡ ለእሳተ፡ ሰማይ፡ ወርኢኩ፡
 በውስቴቶሙ፡ አዕማደ፡ ሰማይ፡ ዘእሳት፡ ዘይወርዱ፡ ወአልቦሙ፡ ጐልቀሁ፡ ወኢመንገለ፡
 መልዕልት፡ ወኢመንገለ፡ ዕመቅ፡፡
 ወዲበ፡ ውእቱ፡ ንቅዑት፡ ርኢኩ፡ መካነ፡ ወኢጽንዐ፡ ሰማይ፡ ላዕሌሁ፡ ወኢመሠረተ፡
 ምድር፡ በታሕቱ፡ ወኢማይ፡ አልቦ፡ ላዕሌሁ፡ ወኢአዕዋፍ፡ አላ፡ መካነ፡ በድው፡ ውእቱ፡፡
 ወግሩመ፡ ርኢኩ፡ በህየ፡ ፯ ከዋክብተ፡ ከመ፡ ዐበይት፡ አድባር፡ ዘይነድዱ፡ ወከመ፡ መንፈስ፡
 ዘይሴአለኒ፡፡
 ይቤ፡ መልአክ፡ ዝውእቱ፡ መካነ፡ ተፍጻሜቱ፡ ለሰማይ፡ ወለምድር፤ ቤተ፡ ሞቅሕ፡
 ኮኖሙ፡ ዝንቱ፡ ለከዋክብተ፡ ሰማይ፡ ወለኅይለ፡ ሰማይ፡፡ ወከዋክብት፡ እለ፡ ያንኩረኩሩ፡
 ዲበ፡ እሳት፡ ወእሉ፡ ውእቶሙ፡ እለ፡ ጎለፉ፡ ትእዛዘ፡ እግዚአብሔር፡ እምቅድመ፡
 ጽባሐሙ፡ እስመ፡ ኢመጽኡ፡ በጊዜሆሙ፡፡
 ወተምዕዖሙ፡ ወአሠሮሙ፡ እስከ፡ ጊዜ፡ ተፍጻሜተ፡ ጎጢአቶሙ፡ በዓመተ፡ ምሥጢር፡፡

ክፍል፡ ፲፱፡፡

ወይቤለኒ፡ ኡርኤል፡ በዝየ፡ ተደሚሮሙ፡ መላእክት፡ ምስለ፡ አንስት፡ ቀውሙ፡
 መናፍቅቲሆሙ፡ ወብዙጋ፡ ራእየ፡ ከዊኖሙ፡ አርኩስዎሙ፡ ለሰብእ፡ ወያስሕትዎሙ፡
 ለሰብእ፡ ከመ፡ ይሠዑ፡ ለአጋንንት፡ ከመ፡ አማልክት፡ እስመ፡ በዕለት፡ ዐባይ፡ ኩነኔ፡
 በዘይትኬነኑ፡ እስከ፡ ይትፈጸሙ፡፡
 ወአንስቲያሆሙኒ፡ አስሒቶን፡ መላእክተ፡ ሰማይ፡ ከመ፡ ሰላማውያን፡ ይከውና፡፡

ወአነ፡ሄኖክ፡ርኢኩ፡አርኢያ፡ባሕቲትየ፡አጽናፈ፡ኩሉ፡ወአልቦ፡ዘርእየ፡እምሰብእ፡
ከመ፡አነ፡ርኢኩ፡።

ክፍል፡፳።

ወዝንቱ፡ውእቱ፡አስማ ቲሆሙ፡ለእለ፡ይተግሁ፡ቅዱሳን፡መላእክት፡።
ኡርኤል፡፩እምነ፡መላእክት፡ቅዱሳን፡እስመ፡ዘረዓም፡ወዘረዓድ፡።
ሩፋኤል፡፩እምነ፡መላእክት፡ቅዱሳን፡ዘመናፍስተ፡ሰብእ፡።
ራጉኤል፡፩እምነ፡መላእክት፡ቅዱሳን፡ዘይትቤቀሎ፡ለዓለም፡ወለብርሃናት፡።
ሚካኤል፡፩እምነ፡መላእክት፡ቅዱሳን፡እስመ፡በደብ፡ሠናይቱ፡ለሰብእ፡ተአዛዚ፡ደብ፡
ሕዝብ፡።
ሰረቃኤል፡፩እምነ፡መላእክት፡ቅዱሳን፡ዘደብ፡መናፍስተ፡እጓለ፡እመሕያው፡
ዘመናፍስተ፡ያሳጥኡ፡።
ገብርኤል፡፩እምነ፡መላእክት፡ቅዱሳን፡ዘደብ፡አኪስት፡ወዘደብ፡ገነት፡ወዘኪሩቤል፡።

ክፍል፡፳፩።

ወአድኩ፡እስከ፡መካን፡ኀበ፡አልቦ፡ዘይትገበር፡።
ወርኢኩ፡በህየ፡ግብረ፡ግሩመ፡ኢሰማየ፡ልዑለ፡ወኢምድረ፡ሱርርተ፡አላ፡መካነ፡
በድው፡ዘድልው፡ወግፋም፡።
ወህየ፡ርኢኩ፡፩ ከዋክብተ፡ሰማይ፡እሱራን፡በላዕሌሁ፡ኀብረ፡ከመ፡አድባር፡ዐበይት፡
ወከመ፡ዘእሳት፡እንዘ፡ይነድዱ፡።
ውእተ፡ጊዜ፡እቤ፡በእንተ፡አይ፡ኀጢአት፡ተአሥሩ፡ወበእንተ፡ምንት፡ዝየ፡ተገድፋ፡።
ወይቤለኒ፡ኡርኤል፡፩እምነ፡መላእክት፡ቅዱሳን፡ዘምስሌየ፡ውእቱ፡ይመርሀኒ፡
ወይቤ፡ሄኖክ፡በእንተ፡መኑ፡ትሴአል፡ወበእንተ፡መኑ፡ትጤይቅ፡ወትስእል፡ወትጽህቅ፡።
እሉ፡ውእቶሙ፡እምነ፡ከዋክብት፡እለ፡ኀለፋ፡ትእዛዘ፡እግዚአብሔር፡ልዑል፡
ወተአሥሩ፡በዝየ፡እስከ፡ይትፌጸም፡ትእልፊተ፡ዓለም፡ኀልቁ፡መዋዕለ፡ኃጢአቶሙ፡።
ወእምህየ፡ሐርኩ፡ካልአ፡መካነ፡እምዝ፡ዘይጌርም፡ወርኢኩ፡ግብረ፡ግሩመ፡እሳት፡
ዐቢይ፡በህየ፡ዘይነድድ፡ወያንበለብል፡ወመምተርት፡ቦቱ፡ወሰኑ፡እስከ፡ቀላይ፡ፍጹም፡
አዕማደ፡እሳት፡ዐበይት፡ዘያወርድዎሙ፡።
ወኢአምግኖ፡ወኢዕቡዮ፡ኢክህልኩ፡ነጽሮ፡ወስእንኩ፡ነጽሮ፡ዐይኑ፡።
ውእተ፡ጊዜ፡እቤ፡እፎ፡ግሩም፡ዝንቱ፡መካን፡ወሕማም፡ለነጽሮ፡።
ውእተ፡ጊዜ፡አውሥኦኒ፡ኡርኤል፡፩እመላእክት፡ቅዱሳን፡ዘምስሌየ፡ሀለወ፡
አውሥኦኒ፡ወይቤለኒ፡ሄኖክ፡ምንት፡ውእቱ፡ፍርሃትከ፡ከመዝ፡ወድንጋዬከ፡
በእንተዝ፡ግሩም፡መካን፡ወቅድመ፡ገጹ፡ለዝ፡ሕማም፡።
ወይቤለኒ፡ዝመካን፡ቤተ፡ሞቅሐሙ፡ለመላእክት፡ወበህየ፡ይትአኅዙ፡እስከ፡ለዓለም፡።

ምዕራፍ፡፳።

ክፍል፡፳፪።

ወእምህየ፡ሐርኩ፡ካልአ፡መካነ፡ወአርአየኒ፡በምዕራብ፡ደብረ፡ዐቢየ፡ወነዋኀ፡
ወከኩሕ፡ጽኑዕ፡ወ፬ መካናት፡ሠናያት፡።
ወበውስቴቱ፡ዘቦቱ፡ዕሙቅ፡ወርኀብ፡ወልሙጽ፡ጥቀ፡ከመ፡ልሙጽ፡ዘያንከራከር፡
ወዕሙቅ፡ወጽልመት፡ለነጽሮ፡።
ውእተ፡ጊዜ፡አውሥኦኒ፡ሩፋኤል፡፩እመላእክት፡ቅዱሳን፡ዘሀለወ፡ምስሌየ፡
ወይቤለኒ፡እላ፡መካናት፡ሠናያት፡ከመ፡ይትጋብኡ፡ደቢሆን፡መናፍስት፡ነፍሶሙ፡
ለምውታን፡ሎሙ፡እሎንቱ፡ተፈጥሩ፡ዝየ፡ያስተጋብኡ፡ኩሎ፡ነፍሰ፡ውሉደ፡
ሰብእ፡።
ወእሙንቱ፡መካናት፡ኀበ፡ያነብርዎሙ፡ገብሩ፡እስከ፡ዕለተ፡ኩነኔሆሙ፡ወእስከ፡አመ፡
ዕድሜሆሙ፡ወዕድሜ፡ውእቱ፡ዐቢይ፡እስከ፡አመ፡ኩነኔ፡ዐቢይ፡በላዕሌሆሙ፡።

ወርኢኩ፡ መናፍስተ፡ ውሉደ፡ ሰብእ፡ እንዘ፡ ምውታን፡ ውእቶሙ፡ ወቃሎሙ፡
 ይበጽሕ፡ እስከ፡ ሰማይ፡ ወይሰኪ፡
 ይእተ፡ ጊዜ፡ ተስእልክዎ፡ ለሩፋኤል፡ መልእክ፡ ዘሀሎ፡ ምስሌየ፡ ወእቤሎ፡ ዝመንፈስ፡
 ዘመኑ፡ ውእቱ፡ ዘከመዝ፡ ቃሉ፡ ይበጽሕ፡ ወይሰኪ፡
 ወአውሥኦሊ፡ ወይቤለኒ፡ እንዘ፡ ይብል፡ ዝንቱ፡ መንፈስ፡ ውእቱ፡ ዘይወፅእ፡ እምኦቤል፡
 ዘቀተሎ፡ ቃየል፡ እኑሁ፡ ወይሰኪ፡ ኪያሁ፡ እስከ፡ ሰባ፡ ይትቃጉል፡ ዘርኡ፡ እምገጸ፡
 ምድር፡ ወእምዘርኡ፡ ሰብእ፡ ይማሰን፡ ዘርኡ፡ ወበእንተዝ፡ ውእተ፡ ጊዜ፡ ተስእልኩ፡
 በእንቲአሁ፡ ወበእንተ፡ ኩነኔ፡ ኩሉ፡ ወእቤ፡ በእንተ፡ ምንት፡ ተፈልጠ፡ ፩ እምነ፡ ፩፡
 ወአውሥኦሊ፡ ወይቤለኒ፡ እሉ፡ ፫ ተገብሩ፡ ከመ፡ ይፍልጡ፡ መንፈሶሙ፡ ለምውታን፡
 ወከመዝ፡ ተፈልጠ፡ ነፍሶሙ፡ ለጸድቃን፡ ዝውእቱ፡ ነቅዐ፡ ማይ፡ በላዕሌሁ፡ ብርሃን፡
 በከመ፡ ከማሁ፡ ተፈጥረ፡ ለኃጥኦን፡ ሰባ፡ ይመውቱ፡
 ወይትቀበሩ፡ ውስተ፡ ምድር፡ ወኩነኔ፡ ኢኮነ፡ በላዕሌሆሙ፡ በሕይወቶሙ፡
 ወበዝዋ፡ ይትፈለግ፡ ነፍሳቲሆሙ፡ ዲበ፡ ዛቲ፡ ዐባይ፡ ፃዕር፡ እስከ፡ አመ፡ ዐባይ፡ ዕለት፡
 እንተ፡ ኩነኔ፡ ወመቅሠፍት፡ ወፃዕር፡ ለእለ፡ ይረግሙ፡ እስከ፡ ለዓለም፡ ወበቀል፡
 ለነፍሶሙ፡ ወበህየ፡ የአሥሮሙ፡ እስከ፡ ለዓለም፡
 ወእመኒ፡ ውእቱ፡ እምቅድሙ፡ ዓለም፡ ወከመዝ፡ ተፈልጠ፡ ለነፍሶሙ፡ ለእለ፡ ይሰክደ፡
 ወለእለ፡ ያርእዩ፡ በእንተ፡ ሕጉለት፡ አመ፡ ተቀትሉ፡ በመዋዕለ፡ ኃጥኦን፡
 ከመዝ፡ ተፈጥረ፡ ለነፍሶሙ፡ ለሰብእ፡ እለ፡ ኢኮነ፡ ጸድቃን፡ አላ፡ ኃጥኦን፡ እለ፡ ፍጹማነ፡
 አበሳ፡ ወምስለ፡ አባሲያን፡ ይከውኑ፡ ከማሆሙ፡ ወነፍሶሙ፡ ኢትትቀተል፡ በዕለተ፡
 ኩነኔ፡ ወኢይትነሥኡ፡ እምዝዋ፡
 ውእተ፡ ጊዜ፡ ባረክዎ፡ ለእግዚአ፡ ስብሐት፡ ወእቤ፡ ቡሩክ፡ ውእቱ፡ እግዚእየ፡ እግዚአ፡
 ስብሐት፡ ወጽድቅ፡ ዘኩሎ፡ ይመልክ፡ እስከ፡ ለዓለም፡

ክፍል፡ ፳፫፡

ወእምህየ፡ ሐርኩ፡ ካልአ፡ መካነ፡ መንገለ፡ ዓረብ፡ እስከ፡ አጽናፈ፡ ምድር፡
 ወርኢኩ፡ እሳተ፡ ዘይነድድ፡ ወይረውፅ፡ እንዘ፡ ኢያዐርፍ፡ ወኢይነትግ፡ እምሩጸቱ፡
 መዓልተ፡ ወሌሊተ፡ አላ፡ ከማሁመ፡
 ወተስእልኩ፡ እንዘ፡ እብል፡ ዝንቱ፡ ምንት፡ ውእቱ፡ ዘአልቦ፡ ዕረፍት፡
 ውእተ፡ ጊዜ፡ አውሥኦሊ፡ ራጉኤል፡ ፩ እምነ፡ መላእክት፡ ቅዱሳን፡ ዘሀሎ፡ ምስሌየ፡
 ወይቤለኒ፡ ዝንቱ፡ ዘርኢከ፡ ሩጸተ፡ ዘመንገለ፡ ዐረብ፡ እሳት፡ ዘይነድድ፡ ውእቱ፡ ኩሉ፡
 ብርሃናተ፡ ሰማይ፡

ክፍል፡ ፳፬፡

ወእምህየ፡ ሐርኩ፡ ካልአ፡ መካነ፡ ምድር፡ ወአርኦየሊ፡ ደብረ፡ እሳት፡ ዘያንበለብል፡
 መዓልተ፡ ወሌሊተ፡
 ወሐርኩ፡ መንገሌሁ፡ ወርኢኩ፡ ፯ አድባረ፡ ክቡራነ፡ ወኩሉ፡ ፩ እምነ፡ ፩ እንዘ፡
 ይትዌለጥ፡ ወአዕባነ፡ ክቡራነ፡ ወሠናያነ፡ ወኩሉ፡ ክቡር፡ ወስብሕ፡ ራእዮሙ፡ ወሠናይ፡
 ገጽሙ፡ ፫ መንገለ፡ ጽባሕ፡ ወጽኑዓን፡ ፩ ዲበ፡ ፩ ወ፫ መንገለ፡ ሰሜን፡ ወጽኑዓን፡ ፩ ዲበ፡
 ፩ ወቁላተ፡ ዕሙቃተ፡ ወጠዋያተ፡ አሐቲ፡ ለአሐቲ፡ ኢይትቃረባ፡
 ወሳብዕ፡ ደብር፡ ማእከሎሙ፡ ለእሎንቱ፡ ወኑኖሙ፡ ይትማሰሉ፡ ኩሎሙ፡ ከመ፡
 መንበረ፡ አትሮንስ፡ ወየዐውድዎ፡ ዕፀወ፡ መዐዛ፡
 ወሀሎ፡ ውስቴቶሙ፡ ዕፅ፡ አልቦ፡ ግሙራ፡ አመ፡ ዪነወኒ፡ ወኢ ፩ እምውስቴቶሙ፡
 ወባዕዳንሂ፡ ዘከማሁ፡ ኢኮነ፡ ዘይምዕዝ፡ እምኩሉ፡ መዐዛ፡ ወቁጽሉ፡ ወጽጌሁ፡ ወዕፁ፡
 ኢይጸመሂ፡ ለዓለም፡ ወፍሬሁኒ፡ ሠናይ፡ ወፍሬሁሰ፡ ከመ፡ አስካለ፡ በቀልት፡
 ወውእተ፡ ጊዜ፡ እቤ፡ ነዋ፡ ዝንቱ፡ ሠናይ፡ ዕፅ፡ ወሠናይ፡ ለርእይ፡ ወአዳም፡ ቁጽሉ፡
 ወፍሬሆኒ፡ ሞገስ፡ ጥቀ፡ ለርእየ፡ ገጽ፡
 ወውእተ፡ ጊዜ፡ አውሥኦሊ፡ ሚካኤል፡ ፩ እምነ፡ መላእክት፡ ቅዱሳን፡ ወክቡራን፡
 ዘምስሌየ፡ ሀሎ፡ ውእቱ፡ ዘዲሌሆሙ፡

ክፍል : ፳፭ ፡፡

ወይቤለኒ ፡ ሄኖክ ፡ ምንተ ፡ ትሴአለኒ ፡ በእንተ ፡ መወዛሁ ፡ ለዝ ፡ ዕፅ ፡ ትጤይቅ ፡ ከመ ፡ ታእምር ፡፡
 ወውእተ ፡ ጊዜ ፡ አውሣእክዎ ፡ አነ ፡ ሄኖክ ፡ እንዘ ፡ እብል ፡ በእንተ ፡ ኩሉ ፡ እፈቅድ ፡ አእምር ፡ ወፈድፋደሰ ፡ በእንተዝ ፡ ዕፅ ፡፡
 ወአውሥአኒ ፡ እንዘ ፡ ይብል ፡ ዝንቱ ፡ ደብር ፡ ዘርኢከ ፡ ነዊኅ ፡ ዘርእሱ ፡ ይመስል ፡ መንበሮ ፡ ለእግዚእ ፡ መንበሩ ፡ ውእቱ ፡ ኅበ ፡ ይነብር ፡ ቅዱስ ፡ ወዐቢይ ፡ እግዚእ ፡ ስብሐት ፡ ንጉሥ ፡ ዘለዓለም ፡ ሰበ ፡ ይወርድ ፡ የሐውጸ ፡ ለምድር ፡ በሠናይ ፡፡
 ወዝንቱኒ ፡ ዕፅ ፡ መወዛ ፡ ሠናይ ፡ ወኢ፩ ዘሥጋ ፡ አልቦ ፡ ሥልጣን ፡ ከመ ፡ ይግሥሥ ፡ እስከ ፡ አመ ፡ ዐቢይ ፡ ኩነኔ ፡ አመ ፡ ይትቤቀል ፡ ኩሉ ፡ ወይትፌጸም ፡ እስከ ፡ ለዓለም ፡ ዝኩ ፡ ለጻድቃን ፡ ወለትሑታን ፡ ይትወሀብ ፡፡
 እምፍሬ ፡ ዚአሁ ፡ ይትወሀብ ፡ ለኅሩያን ፡ ሕይወት ፡ መንገለ ፡ መስዕ ፡ ይተከል ፡ ውስተ ፡ መካን ፡ ቅዱስ ፡ መንገለ ፡ ቤቱ ፡ ለእግዚእ ፡ ንጉሥ ፡ ዘለዓለም ፡፡
 ውእተ ፡ ጊዜ ፡ ይትፌሥሑ ፡ በፍሥሑ ፡ ወይትሐሠዩ ፡ ውስተ ፡ ቅዱስ ፡ ያበውኡ ፡ ሎቱ ፡ መወዛ ፡ በበአዕፅም ቲሆሙ ፡ ወሕይወተ ፡ ብዙኃ ፡ የሐይወ ፡ በዲብ ፡ ምድር ፡ በከመ ፡ ሐይወ ፡ አበዊከ ፡ ወበመዋዕሊሆሙ ፡ ኅዘን ፡ ወሕማም ፡ ወጻማ ፡ ወመቅሠፍት ፡ ኢይገሥሥሙ ፡፡
 ውእተ ፡ ጊዜ ፡ ባረክዎ ፡ ለእግዚእ ፡ ስብሐት ፡ ንጉሥ ፡ ዘለዓለም ፡ እስመ ፡ አስተዳለወ ፡ ከመዝ ፡ ለሰብእ ፡ ጻድቃን ፡ ወከመዝ ፡ ፈጠረ ፡ ወይቤ ፡ የሀብዎሙ ፡፡

ክፍል : ፳፮ ፡፡

ወእምሆ ፡ ሐርኩ ፡ ማእከለ ፡ ምድር ፡ ወርኢኩ ፡ መካነ ፡ ቡሩከ ፡ ወጥሉለ ፡ ዘቦቱ ፡ አዕፅቅ ፡ ዘይነብር ፡ ወይሠርፅ ፡ እምዕፅ ፡ ዘተመትረ ፡፡
 ወበሆ ፡ ርኢኩ ፡ ደብረ ፡ ቅዱስ ፡ ወመትሕተ ፡ ደብር ፡ ማይ ፡ ዘመንገለ ፡ ጽባሑ ፡ ወውኅዘቱ ፡ መንገለ ፡ ሰሜን ፡፡
 ወርኢኩ ፡ መንገለ ፡ ጽባሕ ፡ ካልአ ፡ ደብረ ፡ ዘይነውኅ ፡ ከመዝ ፡ ወማእከሎሙ ፡ ቁላ ፡ ዕሙቅ ፡ ወአልቦ ፡ ራኅብ ፡ ወላቲኒ ፡ የሐውር ፡ ማይ ፡ መንገለ ፡ ደብር ፡፡
 ወመንገለ ፡ ዐረቡ ፡ ለዝ ፡ ካልእ ፡ ደብር ፡ ወይቱሐቶ ፡ ሎቱ ፡ ወአልቦ ፡ ኑኅ ፡ ወቁላ ፡ ታሕቱ ፡ ማእከሎሙ ፡ ወካልአት ፡ ቁላት ፡ ዕሙቃት ፡ ወይቡላት ፡ መንገለ ፡ ጽንፈ ፡ ሠለስቲሆሙ ፡፡
 ወኩሉ ፡ ቁላቱ ፡ ዕሙቃት ፡ ወአልቦን ፡ ራኅብ ፡ እምኩኩሕ ፡ ጽኑዕ ፡ ወዕፅ ፡ ይተከል ፡ በሳዕሌሆሙ ፡፡
 ወአንከርኩ ፡ በእንተ ፡ ኩኩሕ ፡ ወአንከርኩ ፡ በእንተ ፡ ቁላ ፡ ወጥቀ ፡ አንከርኩ ፡፡

ክፍል : ፳፯ ፡፡

ውእተ ፡ ጊዜ ፡ እቤ ፡ በእንተ ፡ ምንት ፡ ዛቲ ፡ ምድር ፡ ቡርክት ፡ ወኩለንታሃ ፡ ዕፅወ ፡ ምልዕት ፡ ወዛቁላ ፡ ርግምት ፡ ማእከሎሙ ፡፡
 ውእተ ፡ ጊዜ ፡ አውሥአኒ ፡ ኡራኤል ፡ ፩እመላእክት ፡ ቅዱሳን ፡ ዘሀሎ ፡ ምስሌየ ፡ ወይቤለኒ ፡ ዛቁላ ፡ ርግምት ፡ ለርጉማን ፡ እስከ ፡ ለዓለም ፡ ዝየ ፡ ይትጋብኡ ፡ ኩሎሙ ፡ እለ ፡ ይብሉ ፡ በአፋሆሙ ፡ ላዕለ ፡ እግዚአብሔር ፡ ቃለ ፡ ዘኢይደሉ ፡ ወበእንተ ፡ ስብሐተ ፡ ዚአሁ ፡ ይትናገሩ ፡ ዕፅባተ ፡ ዝየ ፡ ያስተጋብእዎሙ ፡ ወዝየ ፡ ምኩናኖሙ ፡፡
 ወበደጋሪ ፡ መዋዕል ፡ ይከውን ፡ ላዕሌሆሙ ፡ አርአያ ፡ ኩነኔ ፡ ዘበጽድቅ ፡ በቅድመ ፡ ጻድቃን ፡ ለዓለም ፡ ኩሎ ፡ መዋዕለ ፡ በዝየ ፡ ይባርክዎ ፡ መሀርያን ፡ ለእግዚእ ፡ ስብሐት ፡ ንጉሥ ፡ ዘለዓለም ፡፡ ወበመዋዕለ ፡ ኩነኔሆሙ ፡ ይባርክዎ ፡ በምሕረት ፡ በከመ ፡ ከፈሎሙ ፡፡
 ውእተ ፡ ጊዜ ፡ አነኒ ፡ ባረክዎ ፡ ለእግዚእ ፡ ስብሐት ፡ ወነገርኩ ፡ ሎቱ ፡ ወዘከርኩ ፡ በከመ ፡ ይደሉ ፡ ለዕቡዩ ፡፡

ክፍል : ፳፰ ፡፡

ወእምሆ ፡ ሐርኩ ፡ መንገለ ፡ ጽባሕ ፡ ማእከላ ፡ ለደብረ ፡ መድበራ ፡ ወርኢክዎ ፡ ገዳመ ፡ ባሕቲቶ ፡፡
 ወባሕቱ ፡ ምሉእ ፡ ዕፅወ ፡ እምነ ፡ ዝንቱ ፡ ዘርእ ፡ ወማይ ፡ እምላዕሉ ፡ ይፈለፍል ፡ በላዕሉ ፡፡

ያስተርኢ፡ አስራብ፡ ከመ፡ ብዙኅ፡ ዘይሰርብ፡ ከመ፡ መንገለ፡ መስዕ፡ መንገለ፡ ዐረብ፡
ወእምኩለሄኒ፡ የዐርግ፡ ወእምህየኒ፡ ማይ፡ ወጠል።

ክፍል፡ ፳፱።

ወሐርኩ፡ ውስተ፡ መካን፡ ካልእ፡ እምነ፡ መድበራ፡ መንገለ፡ ጽባሐ፡ ለውእቱ፡ ደብር፡
ቀረብኩ።
ወበህየ፡ ርኢኩ፡ ዕፀወ፡ ኩነኔ፡ ፈድፋደ፡ ቁስቁሰ፡ መዐዛ፡ ለስኒን፡ ወከርቤ፡ ወዕፀወኒ፡
ኢይትማሰሉ።

ክፍል፡ ፴።

ወላዕሌሁ፡ ላዕለ፡ እላንቱ፡ ላዕለ፡ ደብረ፡ ጽባሕ፡ ወአኮ፡ ርኑቅ፡ ወርኢኩ፡ መካን፡ ካልእ፡
ቁላተ፡ ማይ፡ ከመ፡ ዘኢይትዌዳዕ።
ወርኢኩ፡ ዕፀ፡ ሠናየ፡ ወመዐዛሁ፡ ከመ፡ ዘሰኪኖን።
ወመንገለ፡ ክነፊሆሙ፡ ለቁላት፡ እሎንቱ፡ ርኢኩ፡ ቀናንሞስ፡ ዘመዐዛ፡ ወዲበ፡ እልክቱ፡
ቀረብኩ፡ ዘመንገለ፡ ጽባሕ።

ክፍል፡ ፴፩።

ወርኢኩ፡ ካልእ፡ ደብረ፡ ዘቦቱ፡ ዕፀው፡ ወይወፅእ፡ ማይ፡
ወይወፅእ፡ እምኔሁ፡ ከመ፡ ኔቄጥሮ፡ ዘስሙ፡ ሳሪራ፡ ወከልበኔን።
ወዲበ፡ ውእቱ፡ ደብር፡ ርኢኩ፡ ደብረ፡ ካልእ፡ ወውስቴቱ፡ ዕፀው፡ ዘዓልዋ፡
ወእልኩ፡ ዕፀው፡ ምሉእን፡ ዘከመ፡ ከርካዕ፡ ወጽኑዕ።
ወሶበ፡ ይነሥእዎ፡ ለውእቱ፡ ፍሬ፡ ይኔይስ፡ እምኩሉ፡ አፈው።

ክፍል፡ ፴፪።

ወእምድኅረ፡ እሉ፡ አፈው፡ ለመስዕ፡ እንዘ፡ እኔጽር፡ መልዕልተ፡ አድባር፡ ርኢኩ፡ ፯
አድባር፡ ምሉዓነ፡ ሰንበልት፡ ቅድድ፡ ወዕፀወ፡ መዐዛ፡ ወቀናንሞን፡ ወጥጥረ።
ወእምህየ፡ ሐርኩ፡ መልዕልተ፡ ርእሶሙ፡ ለእልኩ፡ አድባር፡ እንዘ፡ ርኑቅ፡ ውእቱ፡
ለጽባሕ፡ ወኅለፍኩ፡ እንተ፡ ዲበ፡ ባሕረ፡ ኤርትራ፡ ወእምኔሁ፡ ርኑቅ፡ ኮንኩ፡
ወኅለፍኩ፡ መልዕልተ፡ ለመልአክ፡ ዙጥኤል።
ወመጻእኩ፡ ውስተ፡ ገነተ፡ ጽድቅ፡ ወርኢኩ፡ ካሐካሐቲሆሙ፡ ለእልክቱ፡ ዕፀው፡ ዕፀወ፡
ብዙኃነ፡ ወዐቢያነ፡ ይበቃሉ፡ በህየ፡ ወእንዘ፡ ዪናሆሙ፡ ሠናይ፡ ዐቢያን፡ ወስኖሙ፡
ብዙኅ፡ ወስቡሐን፡ ወዕፀ፡ ጥበብ፡ ዘእምኔሁ፡ በሊያሙ፡ የእምርዋ፡ ለጥበብ፡ ዐባይ።
ወይመስል፡ ሐመረ፡ ጽራእ፡ ወፍሬሁ፡ ከመ፡ አስካለ፡ ወይን፡ ጥቀ፡ ሠናይ፡ ወዪናሁ፡
ለውእቱ፡ ዕፅ፡ የሐውር፡ ወይበጽሕ፡ ነዊኃ።
ወእቤ፡ ሠናይ፡ ዝዕፅ፡ ወከመ፡ ሠናይ፡ ወፍሠሕ፡ ርእየቱ። ወአውሥኢ፡ መልአክ፡
ቅዱስ፡ ሩፋኤል፡ ዘምስሌየ፡ ሀሎ፡ ወይቤለኒ፡ ዝውእቱ፡ ዕፀ፡ ጥበብ፡ ዘእምኔሁ፡ በልዑ፡
አቡከ፡ አረጋዊ፡ ወእምከ፡ እቤራዊት፡ እለ፡ ቀደሙከ፡ ወአእመርዋ፡ ለጥበብ፡ ወተፈትሐ፡
አዕይንቲሆሙ፡ ወአእመሩ፡ ከመ፡ ዕራቃኒሆሙ፡ ሀለው፡ ወተሰዱ፡ እምገነት።

ክፍል፡ ፴፫።

ወእምህየ፡ ሐርኩ፡ እስከ፡ አጽናፈ፡ ምድር፡ ወርኢኩ፡ በህየ፡ አራዊተ፡ ዐበይተ፡
ወይትዌለጥ፡ ፩እምካልኡ፤ ወአዕዋፍሂ፡ ይትዌለጥ፡ ገጾም፡ ወስኖሙ፡ ወቃሎሙሂ፡
ይትዌለጥ፡ ፩እምካልኡ።
ወበጽባሐሙ፡ ለእሉ፡ አራዊት፡ ርኢኩ፡ አጽናፈ፡ ምድር፡ በኀበ፡ ሰማይ፡ ያዐርፍ፡
ወኀዋኅወ፡ ሰማይ፡ ርኅዋተ።
ወርኢኩ፡ እፎ፡ ይወፅኡ፡ ከዋክብተ፡ ሰማይ፡ ወኑለቁ፡ ዘእምነ፡ ይወፅኡ፡ ኀዋኅወ፡
ወጸሐፍኩ፡ ኩሎ፡ ሙጻእሙ፡ ለለ ፩ በኑልቆሙ፤ ወአስማቲሆሙ፤ በደርኅሙ፤
ወምንባርሙ፤ ወጊዜሆሙ፤ ወአውራኒሆሙ፤ በከመ፡ አርአየኒ፡ መልአክ፡ ኡርኤል፡
ዘምስሌየ፡ ሀሎ።

ወኩሎ፡ አርአያሊ፡ ሊተ፡ ወጸሐፎ፤ ወዓዲ፡ አሰማቲሆሙ፡ ጸሐፈ፡ ሊተ፡
ወትእዛዛቲሆሙ፡ ወምግባራቲሆሙ፡፡

ክፍል፡ ፴፬፡፡

ወእምሆ፡ ሐርኩ፡ መንገለ፡ መስዕ፡ በአጽናፈ፡ ምድር፡ ወበህየ፡ ርኢኩ፡ መንክረ፡ ዐቢየ፡
ወስቡሐ፡ በአጽናፈሃ፡ ለኩላ፡ ምድር፡፡
ወበህየ፡ ርኢኩ፡ ኅዋኅወ፡ ሰማይ፡ ፍቱሐተ፡ በሰማይ፡ ፫ በ፩ እምኔሆሙ፡ ይወጽኡ፡
ነፋሳት፡ በመንገለ፡ መስዕ፡ ሰበ፡ ይነፍሕ፡ ቍር፡ ወበረድ፡ ወአስሐትያ፡ ወሐመዳ፡ ወጠል፡
ወዝናም፡፡
ወእምአሐቲ፡ ኖሳት፡ በሠናይ፡ ይነፍሳ፡ ወሰበ፡ በ፪ ሆሙ፡ ኅዋኅወ፡ ይነፍሱ፡ በኅይል፡
ወበፃዕር፡ ይከውን፡ ዲበ፡ ምድር፡ ወበኅይል፡ ይነፍሱ፡፡

ክፍል፡ ፴፭፡፡

ወእምሆ፡ ሐርኩ፡ መንገለ፡ ዐረብ፡ በአጽናፈ፡ ምድር፡ ወርኢኩ፡ በህየ፡ ፫ ኅዋኅወ፡
ርኅዋተ፡ በከመ፡ ርኢኩ፡ በምሥራቅ፡ በአምግነ፡ ኅዋኅወ፡ ወበአምግነ፡ ሙፃአቱ፡፡

ክፍል፡ ፴፮፡፡

ወእምሆ፡ ሐርኩ፡ መንገለ፡ አዜብ፡ በአጽናፈ፡ ምድር፡ ወበህየ፡ ርኢኩ፡ ፫ ኅዋኅወ፡
ሰማይ፡ ርኅዋተ፡ ወይወፅእ፡ እምሆ፡ አዜብ፡ ወጠል፡ ወዝናም፡ ወነፋስ፡፡
ወእምሆ፡ ሐርኩ፡ መንገለ፡ ጽባሕ፡ በአጽናፈ፡ ሰማይ፡ ወበህየ፡ ርኢኩ፡ ፫ ኅዋኅወ፡
ሰማይ፡ ርኅዋተ፡ መንገለ፡ ጽባሕ፡ ወላዕሌሆሙ፡ ኅዋኅወ፡ ንዑሳን፡፡
በ፩፡ እምእልኩ፡ ኅዋኅወ፡ ንዑሳን፡ የኅልፉ፡ ከዋክብተ፡ ሰማይ፡ ወየሐውሩ፡ ምዕራብ፡
በፍኖት፡ እንተ፡ ተርእየት፡ ሎሙ፡፡
ወሰበ፡ ርኢኩ፡ ባረኩ፡ ወበኩሉ፡ ጊዜ፡ እባርኮ፡ ለእግዚእ፡ ስብሐት፡ ዘገብረ፡ ተአምራተ፡
ዐቢያነ፡ ወስቡሐነ፡ ከመ፡ ያርኢ፡ ዕብየ፡ ግብሩ፡ ለመላእክቲሁ፡ ወለነፍሳተ፡ ሰብእ፡ ከመ፡
ይሰብሐ፡ ግብሮ፡ ወኩሉ፡ ተግባሩ፡ ከመ፡ ይርአዩ፡ ግብረ፡ ኅይሉ፡ ወይሰብሐዎ፡ ለግ
ብረ፡ እደዊሁ፡ ዐቢይ፡ ወይባርክዎ፡ እስከ፡ ለዓለም፡፡